



Justiz-Clique

1922

Wär eppis uf dr Kuttle het, dä ka sich gratuliere,
Mir tientis nit giniere und iebe do juschtiz.

: Wenn's aim au sott an Krage go:
So isch dä sälber d'schuld
Dass hite juscht uf d'Fasnacht
Si Urtail kunnt.

Dert z'Rieche got's gar durschtig zue, e Trämmler het's erfahre,
Wo aer kunnt z'rugg zuem Karre, isch d'Kurble niene meh.

: Trotz däm doch fahrt dä g'mietlig zue:
Het schlau sich z'hälfe g'wisst
Und uns're schtränge Kontroleur
S'ganz Trämmler — vermisst.

E Dischpitat im Rothuussaal, das kasch gar mängmol heere,
Dert sind si schtark im schneere, s'isch hie und da e Gruus.

: Do pletzlich wird's däm Dokter z'dumm:
So G'schpäss, — die kemme vor;
Er haut e ganz e zinftegi
Däm Lehrer — uf's Ohr.

S'isch wunderscheen im Erlepark, z'schpaziere g'wies zue zwaie,
Wär sich nit druff tuet fraje, dä het kai's Härz im Lib.

: Doch grad bim beschte Schmuuse do,
Dr Maa fahrt juscht derzue;
Verbii isch's mit där Liebi
Sammt — Seelerueh.

Die greschti Fraid hie d'Schelme hän und schtill in's Füschtli lache
Wenn d'Landjäger Musik mache, so gar uf Raise goht.

: In Mailand, dert isch's scheen au gsi,
Bald wär's so uuse ko;
Fascht hätte die si nimme
Iber d'Gränze glo.

Per Gendarm kunnt e Arreschtant vo Lerrach här go z'fahre,
Dä het er fir e narre im Bahnhof äne ka.

: Dert inne weiss er besser b'Schaid,
Wie sie zuem Zoll sind ko;
Goht ab und lot dä g'mietlig
Am Perron — schtoh!

Im Nachtquartier am Sängerescht legt aine sich in d'Klappe,
Kuum drinn' fot aer a z'kratze, was maag ächscht d'Ursach si?

: Dä Züribieter isch nit fuul,
Will's ihn gar eländ ploht
Um doch no kenne z'pfuuse
Uf d'Schtäge — g'hoggt.

Ufblouse, wie dr rainschti Pfau, kunnt aini über d'Gränze,
Die tuet vor Hochmuet glänze im allerneischte G'staad.

: Doch die sind häll am Schwizerzoll,
Wär hätt' au das nit gseeh!
Si isch nohär im Unterrock
Au haimwärtszue — o weh!

Famosi, ächti Schwizerwaar, mir hitte z'Basel finde,
Die si vo Drausse bringe, wie Schpäck, au Käs und Wierscht.

: S'vergieng g'wies mänggem do si Gluuscht
Dä wüssti was fir G'schmack
Die Schmugglerjunte g'ha hänt,
Mainsch — Siegellack!

E Konsummarkeschlussbankett tuet alle hailos g'falle,
Dert in där Mueschterhalle am G'nosseschaftskongräss.

: In Zuekunft kunnt's jetz glii derzue;
Muess ain uf's Baimli go,
Ka d'Buess nohär in's Biechli
Ischriebe — lo!

